

# INUIT ATAQATIGIIT

## INATSISARTUNI



Nuuk, 20. oktober 2010

Inatsisartut suleriaasianni § 36, imm. 1 naapertorlugu matumuuna imaattunik Naalakkersuisunut apeqquteqarpunga:  
(Inatsisartuni ilaasortaqa Olga P. Berthelsen, Inuit Ataqatigiit)

### **Apeqqutit:**

1. Ukiuni kingullerni tallimani nikerarlutik Naalakkersuisuusarsimasut ineqarnerminnut qaammammut akiliutigisartagaat qanorpiaq annertussuseqartarsimappat?
2. Atorfimmut atatillugu inissianut najugaqarfigissallugit pisussaaffilittalinnut ineqarnermut akiliut ukiorpassuarni kingullerni iluarsivigineqartarsimanginneranut suna patsisaava?

### **Tunggavilersuut:**

Inatsisartunut Naalakkersuisunullu il.il. ilaasortat aningaasarsiaqartitaanerit pillugit inatsit 2003-meersoq, kingusinnerusukkulli allanngortinneqartarsimasoq malillugu, Naalakkersuisunut ilaasortaasarsimasut atorfirminnut atatillugu ineqartinneqartarsimapput, Namminersornerullutik/Namminersorlutik Oqartussat sulinermit atatillugu inissiaataanni najugaqarfiusussaataasuni ineqarnermut akileeqataassutip natsorsorneqarnissaanut malittarisassat qaqugumulluunniit atuuttut malillugit ineqarnermut akiliuteqarfiusartussanik. Malittarisassat pineqartut Kalaallit Nunaanni sulinermit atatillugu inissiat pillugit isumaqatigiisummi 14. december 1988-imeersumi (Nalunaarutit C I, 5-1-9) aalajangersarneqarsimapput. Isumaqatigiisummi § 2 naapertorlugu ineqarnermut akileeqataassuteqartitsisoqartarpoq malittarisassat sukumiinerusut isumaqatigiisummi §§ 3-10 aalajangersarneqartut malillugit. Isumaqatigiisummi § 12 malillugu ukiumut ataasiarluni ineqarnermut akileeqataassutip iluarsineqarnissaa tjestemandit kattuffiit isumaqatigiinniutaasartussaagalarpoq. Pissusiviusulli imaapput taamaaliortoqartarsimanani, ilaatigullu tamatuma malitsigisaanik atorfirmut atatillugu inissianut najugaqarfiusussaataaaffiusuni ineqarnermut akileeqataassut allanut sanilliunni annikinnerutinneqartarsimavoq. Ukiuni kingullerni nalinginnarmik pisortat inissiaataanni ineqarnermut akiliutaasartut qaffattarsimaneri eqqarsaatigigaanni tamanna eqqortuliornerusinnaangilaq.

Apeqqutigisakka aqputigalugit taamaammat paaserusuppara, ukiuni kingullerni tallimani nikerarlutik Naalakkersuisuusarsimasut ineqarnerminnut qaammammut akiliutigisartagaat qanorpiaq annertussuseqartarsimanersut – ajornangippat skema atorlugu akissuteqaat saqqummiuteqqara.

Taassuma saniatigut aamma paaserusuppara atorfirmut atatillugu inissianut najugaqarfigissallugit pisussaaffilittalinnut ineqarnermut akiliutip ukiorpassuarni kingullerni iluarsivigineqartarsimanginneranut suna patsisaanersoq, naak tamanna tjestemandit kattuffiit 14. december 1988-imeersumi isumaqatigiisut malillugu pisussaaffioreeraluartoq?